

# Канон пред иконой Пресвятой Богородицы «Всех Скорбящих Радость»

*КАНОН, ГЛАС 4-й*

## Песнь 1

***Ирмос:** Отверзу уста моя, и наполнятся Духа, и слово отрыгну Царице Матери, и явлюся, светло торжествуя, и воспою, радуясь, Тоя чудеса.*

**Припев:** Пресвятая Богородице, спаси нас.

Кую Ти достойную песнь принесет наше неможение, точию обрадовательную, ейже нас Гавриил тайно научил есть: радуйся, Богородице Дево, Мати Невестная.

**Пресвятая Богородице, спаси нас.**

Радуйся, Благодати Источнице; радуйся, Лествице и Дверь Небесная; радуйся, Свещнице, и Стамно золотая, и Гора несекомая, Яже Жизнодавца Христа миру рождающая.

**Пресвятая Богородице, спаси нас.**

Всея моей жизни Предстательнице, от бед многих избави мя, да благодарственный глас воспеваю Ти, Богоневесто Пречистая, и будущия мя исхити муки.

**Пресвятая Богородице, спаси нас.**

Яже всем удобь послушная в скорби и в печали помогающая, Богородице Благая, благодать подаждь пети, Тя дерзающим, Владычице, скорбящих Радосте.

**Слава:** Многобогатную благодать стяжавши, Владычице, дерзновенною Твоею молитвою преславно изми мя от напастей, убогаго раба Твоего, скорбящих Радосте.

**И ныне:** Яже едина в напастех и скорбех защищающая, под кров Твой, Пречистая, прибегающих тепле, прими яко Препоблагая, яже от сердца моления.

## Песнь 3

***Ирмос:** Твоя песнословцы, Богородице, Живый и Независтный Источнице, лик себе совокупльшия, духовно утверди, в Божественней Твоей славе венцев славы сподоби.*

**Пресвятая Богородице, спаси нас.**

Утверждение буди, и прибежище, и покров, Дево Богородительнице, верую к Тебе прибегающим и Божию Тя Матерь исповедающим.

**Пресвятая Богородице, спаси нас.**

Крепость моя, и радость, и веселие, и стена твердая, и Предстательница Ты еси, Всенепорочная, искушений и бед избавляющая мя.

**Пресвятая Богородице, спаси нас.**

Милостивным и кротким Твоим оком, Богородительнице, зрящи мя во обстоянии

и скорби одержима, вскоре свободи: Тя бо призываю на помощь.

**Пресвятая Богородице, спаси нас.**

Кропиши исцелений струи болящим, Дево, всюду: Тя бо источника показа милосердия, Владычице, Иже милости Господь, из Тебе рождейся паче ума.

**Слава:** Источник милости подай скорбящим утешение, Ты еси; темже, Владычице, и мне молитвенных Твоих вод источник источи и угаси страстей пещь.

**И ныне:** Отчаявся помощи всякия, к Тебе, Пренепорочная, державней Хранительнице и покрову, притекох: не отрини убо мене от Божественного покрова Твоего.

Господи, помилуй (трижды). Слава, и ныне:

*Седален, глас 7-й*

Радуйся, Солнца Облаче мысленного и неизреченного, Владычице; радуйся, всесветлая Свеще; радуйся, Свещнице всезлатый; Тобою, Пресвятая, Ева избавися от клятвы. Но яко имущая дерзновение ко Благопременному Сыну Твоему и Богу, матернею молитвою не оскудей о нас молитися, Пречистая.

#### **Песнь 4**

**Ирмос:** *Седяй в Славе на Престоле Божества во облаце легце, прииде Иисус Пребожественный Нетленною Дланию и спасе зовущия: слава, Христе, силе Твоей.*

**Пресвятая Богородице, спаси нас.**

Надеждо ненадежных, помощнице сирых, плачущих утешение, согрешающих очищение, Руководительнице заблудших, болящих Целебнице и исправление падающих, Владычице, спаси рабы Твоя.

**Пресвятая Богородице, спаси нас.**

Не непричастни есмы, Владычице, Твоего заступления в скорбех; темже и ныне нам помози вскоре, люте обуреваемым, руку простирающи, Чистая: буди милостива болезнем нашим, Мати Божия, радость скорую подающи.

**Пресвятая Богородице, спаси нас.**

Вся Благая и теплая Заступница сущи грешником и смиренным, Богородительнице Пречистая Владычице, от бед и скорбей, и грехов спасай рабы Твоя.

**Пресвятая Богородице, спаси нас.**

Преславную Твою Матерь, Христе, прими молящуюся о мире, милостивно Тебе зовущую: Сыне Мой, прими мольбу Мою и утиши гнев, належащий земли.

**Слава:** Кров и заступление, и прибежище буди ми, Дево, рабу Твоему, и избави мя от безмерных зол, воспевати Тя, Пречистая: слава неизреченному Рождеству Твоему.

**И ныне:** Надежда и щит, и утверждение Ты мне еси, Благая, и лютых избавление, и просвещение души моей, и хвала, и стена, и держава.

## Песнь 5

***Ирмос:** Ужасошася всяческая о Божественной славе Твоей: Ты бо, Неискусобрачная Дево, имела еси во утробе над всеми Бога и родила еси Безлетнаго Сына, всем воспевающим Тя мир подавающая.*

**Пресвятая Богородице, спаси нас.**

Ты крепость моя, Ты похвала, и радование, и Хранительница ми еси, и заступление, и прибежище, и Предстательница непобедима, Пресвятая Богородице Дево: темже спаси раба Твоего.

**Пресвятая Богородице, спаси нас.**

Спаси мя, Владычице, из глубины напастей, и скорбей, и печалей, и страстей телесных и в тишине Божественной сохрани душу мою.

**Пресвятая Богородице, спаси нас.**

Молитвеннице неложная, упование христиан, Обрадованная, прими мольбы от нас, прилежно призывающих и молящихся Тебе.

**Пресвятая Богородице, спаси нас.**

Покров мой еси Ты и присное хваление, о Владычице Богородице: никакоже бо презираеши к Тебе прибегающих.

**Слава:** Дом Тя Славы, Гору Божию святую, Чистая, Невесту, Чертог, Храм освящения Сын Божий, в Тя вселивыйся, и рай сладости присносущныя нам содела.

***И ныне:** Стену небориму, Чистая, молитву Твою стяжавше, вопием Ти: умилосердися, о Владычице, и видимыя и невидимыя враги прожени.*

## Песнь 6

***Ирмос:** Божественное сие и всечестное совершающе празднество, Богомудрии, Богоматере, приидите, руками восплецим, от Нея рождашагося Бога славим. Пресвятая Богородице, спаси нас.*

**Пресвятая Богородице, спаси нас.**

Болящих Целительницу, падающих востание, согрешающих очищение, Богородице, Тебе молю, со слезами припадаю и зову Ти: яко сильна Сама мя спаси погибающаго.

**Пресвятая Богородице, спаси нас.**

Ты еси Стена нерушима, Ты еси покров тверд, Богородице Благая, Ты еси Предстательница крепка рабу Твоему: сего ради призываю Тя присно и притекаю к покрову Твоему.

**Пресвятая Богородице, спаси нас.**

Мирови радость сущи, Богородице Чистая, радуйся Тебе, Дево, зовем со Ангелом верно: Твоей радости сподоби ны и печаль нашу разори.

**Пресвятая Богородице, спаси нас.**

Сладость Ангелов, скорбящих Радость, христиан Предстательница Ты еси, Дево Мати Господня: заступи нас и избави вечных мук.

**Слава:** В день печали, егда имам телесных союз разрешитися, предстани ми, Богородительнице, и обдержания бесовскаго исхити.

**И ныне:** Призри, Владычице, на мя, смиреннаго, и паче надежды спаси мя: Ты бо еси упование и покров ми, жизнь и свет сердцу моему, Богородице, и утверждение.

Господи, помилуй (трижды). Слава, и ныне:

### *Кондак, глас 4-й*

Не имамы инья помощи, не имамы инья надежды, разве Тебе, Владычице. Ты нам помози, на Тебе надеемся и Тобою хвалимся, Твои бо есмы рабы, да не постыдимся.

### *Икос*

Прости длани Твоя, имиже всех Владыку яко Младенца прияла еси за множество благодати: не остави нас, всегда надеющихся на Тя, бодренною Твоею молитвою, и неисчетною простынею ущебри нас, и подаждь душам нашим милосердие Твое, во веки источающи, Тебе бо имамы грешнии Заступницу от находящих на ны бед и зол. Но яко имущи милосердия щедроты, ускори на молитву и потщися на умоление, предстательствующи присно, Богородице, чтущих Тя.

### **Песнь 7**

**Ирмос:** *Не послужиша твари Богомудрии паче Создавшаго, но, огненное прещение мужески поправше, радовахуся, поюще: препетый отцев Господь и Бог, благословен еси.*

**Пресвятая Богородице, спаси нас.**

Страстьми престаревся и неослабными напастями, и скорбьми и, доспев к западом жития моего, добродетелем непричастен, леностию снесен быв, вопию Ти, Владычице: утешение земным, помилуй мя.

**Пресвятая Богородице, спаси нас.**

Радуйся, источнице присноживотных воды; радуйся, раю пищный; радуйся, стено верных; радуйся, Неискусобрачная; радуйся, всемирная радосте, Еюже нам возсия хвалимый отцев Бог и препрославлен.

**Пресвятая Богородице, спаси нас.**

Всем, сущим в мире, Заступница еси и стена христианом, и прибежище непостыдно, Чистая Марие. Темже верую Тя чтуще, вопием Христу: отец наших Боже, благословен еси.

**Пресвятая Богородице, спаси нас.**

О благоутробия Твоего, Дево Чистая! Решиши бо безмерныя печали и напасти, призывающим в нужде и обстоянии: темже и ныне, помози, Благословенная, Тя восхваляющим.

**Слава:** Едино упование и помощь верным сущи, Богородительнице, потщися

помощи рабом Твоим, погружаемым скорбями и в болезнях сущим, и прибегающим к Тебе с любовью души.

**И ныне:** Радование благодарственное Тебе приносим, Мати Божия, яко воистинну Тобою избавлени всякаго злаго начинания, и согласно Тебе поем: благословенна еси.

## **Песнь 8**

**Ирмос:** *Отроки благочестивыя в пеци Рождество Богородичо спасло есть; тогда убо образуемое, ныне же действуемое, вселенную всю воздвизает пети Тебе: Господа пойте, дела, и превозносите Его во вся веки.*

**Пресвятая Богородице, спаси нас.**

Радуйся, Престоле славный Божий; радуйся, верных стено, Еюже сущим во тьме возсия Свет, Христос, Тебе блажащим и вопиющим: вся дела Господня, Господа пойте и превозносите во вся веки.

**Пресвятая Богородице, спаси нас.**

Поем Тя, Пречистая и Мати Божия, и кто не славит Тя, воистинну Благоую, сущую надежду душ наших, темже, Пречистая, и мою мольбу приими.

**Пресвятая Богородице, спаси нас.**

Ты еси спасение всех человек, Яже Бога рождающая неизреченно; Ты еси верных спасительница, Богородице, и слепых наставница, и падающих исправление. Темже Тя восхваляюще, Христу зовем: благословите вся дела Господня Господа, пойте и превозносите Его во вся веки.

**Пресвятая Богородице, спаси нас.**

Струи исцелений нам всегда, верным, Чистая, источаеши: темже независтную благодать вземлюще, воспеваем Рождество Твое, Чистая, и превозносим во вся веки.

**Слава:** На Тя возложих, Владычице, сердце, и душу, и тело: не имам бо иныя надежды, разве Тебе, еюже получу милость. Темже подаждь ми богатую Твою благодать.

**И ныне:** На мольбу мою ныне умилосердися и радость в печали место даруй ми, да пою Тя, Владычице, и вопию Сыну Твоему: благословите, вся дела Господня, Господа.

## **Песнь 9**

**Ирмос:** *Всяк земнородный да възыграется, Духом просвещаемь, да торжествует же Безплотных умов естество, почитающее священное торжество Богоматере, и да вопиет: радуйся, Всеблаженная Богородице, Чистая Приснодево.*

**Пресвятая Богородице, спаси нас.**

Радуйся, Марие, великое вся твари чудо; радуйся, Дщи убо Давидова, Господня же Мати; радуйся, пение Гавриилово; радуйся, прибежище и утверждение, и помощь всем, Пресвятая, сущим на земли грешником.

**Пресвятая Богородице, спаси нас.**

Юже изволил еси, Владыко, прими милостивно Молитвенницу, Матерь Твою, о нас, и Твоей благодати всяческая исполнятся: да Тя вси яко Благодетеля величаем.

**Пресвятая Богородице, спаси нас.**

О Дево Благая! О мира радости и прибежище! О хранилище верных и избавление скорбей! Ты предстани ми в час смерти и избави от бесов, ищущих поглотити мя.

**Пресвятая Богородице, спаси нас.**

Ты еси Ангелов радость, Ты еси праведников доброта, Ты еси верных надежда, Ты еси соблюдение наше, Ты еси мост, к жизни нестареющейся преводяй верою и любовию Тя величающия.

*Слава:* О Мати всяческих Творца, всесветлая печальных утешо, оскорбляемых Предстательнице и немощных Заступнице, сохрани мя, Благая, от бед и прилог вражиих.

*И ныне:* Едина болящих посещение, Едина падших исправление, Владычице, Едина к Богу Руководительнице и входе, Едина Ходатаице вечных благ, помилуй мя единого, паче всех согрешившаго.

**Тропарь, глас 2-й:**

Всех скорбящих радости и обидимых заступнице, и алчущих питательнице, страннх утешение, обуреваемых пристанище, больных посещение, немощных покрове и заступнице, жезле старости, Мати Бога Вышняго Ты еси, Пречистая: потщися, молимся, спастися рабом Твоим.

**Кондак, глас 6-й:**

Не имама иныя помощи, не имама иныя надежды, разве Тебе, Владычице. Ты нам помози, на Тебе надеемся и Тобою хвалимся, Твои бо есмы рабы, да не постыдимся.

**Молитва:**

О, Пресвятая Владычице Богородице, Преблагословенная Мати Христа Бога Спасителя нашего, всех скорбящих Радосте, больных посещение, немощных покрове и заступнице, вдовиц и сирых покровительнице, матерей печальных всенадежная утешительнице, младенцев немощных крепосте, и всем беспомощным всегда готовая помощь и верное прибежище! Тебе, о, Всемиловитая, дадеся от Всевышняго благодать во еже всех заступати и избавляти от скорби и болезней, зане Сама лютыя скорби и болезни претерпела еси, взираючи на вольное страдание Сына Твоего возлюбленнаго и Того на кресте распинаема зрящи, егда оружие Симеоном предреченное сердце Твое пройде. Темже убо, о Мати чадолубивая, вонми гласу моления нашего, утеши нас в скорби сущих, яко верная радости Ходатаица: предстоящи престолу Пресвятыя Троицы, одесную Сына Твоего, Христа Бога нашего, можеши, аще восхощеши, вся нам полезная испросити. Сего ради с верою сердечною и любовию от души припадаем к Тебе яко Царице и Владычице и псаломски вопити Тебе дерзаем:

слыша, Дщи, и виждь, и приклони ухо Твое, услыши моление наше, и избави нас от обстоящих бед и скорбей; Ты бо прошения всех верных, яко скорбящих радость, исполняеши, и душам их мир и утешение подавши. Се зриши беду нашу и скорбь: яви нам милость Твою, последи утешение уязвленному печалию сердцу нашему, покажи и удиви на нас грешных богатство милосердия Твоего, подаждь нам слезы покаяния ко очищению грехов наших и утолению гнева Божия, да с чистым сердцем, совестию благою и надеждою несумненною прибегаем ко Твоему ходатайству и заступлению: приими, всемилостивая наша Владычице Богородице, усердное моление наше Тебе приносимое, и не отрини нас, недостойных, от Твоего благосердия, но подаждь нам избавление от скорби и болезни, защити нас от всякаго навета вражия и клеветы человеческая, буди нам помощница неотступная во все дни жизни нашея, яко да под Твоим матерним покровом всегда пребудем цели и сохранена Твоим заступлением и молитвами к Сыну Твоему и Богу Спасителю нашему, Ему же подобает всякая слава, честь и поклонение, со безначальным Его Отцом и Святым Духом, ныне и присно и во веки веков. Аминь.